

Бәрсн диилвр сангдна

1945 джил, январин эклц. Польшин хотл балгьсн—Варшавиг сулдахад, фашистск Германя меджя давад, Одер голиг гатлад, Берлинәс 60 километр газрт—Кюстрип балгьсна өөр, плацдарм буладж авбувдн.

Мана онц танковый полк Чуйков генералин аярмд ордг билә. Апрель сарин 14 өдр, асхн, бидн цугтан танкс дотран орчкад, танксан брезентсәр буркчкәд, шам шатагъад, 1-ч Белорусск фронтин командующ маршал Жуковин дудвр умшдж өгүвдн.

Бүрүлин гегән тасрснас авн ормасн экләд көндрүвдн. Маньгьдуртнь апрелин 15-д, өрүн өрлә, кесг миньгьн артиллерийск товмуд нег командар немшин позицур хацхадж, дävрлгьнд белдвр кев. Тиигчкәд, цуг танкс болн алькчиги наадк машид күчтә проектормудар немшин харслтин газрур хәләлгьдж шатагъад, дävрәд орцхав.

Мана цуг фронтин өмн Зе-

еловск уул көндлнъ зогсджана. Тер уулин белд, Берлинүр ордг төмр болн шоссейн хаалгьс дävрдж гардг поселк бәәдж. Тер поселкд бәәх тагт болн төмр хаалгь хамхлулл уга шулугьар эздж авх төр—мана танксин өмн тävгдсмн. Уулин ора тал өөрддж йовад, младший лейтенант Аристархов, Таланян болн мини—иим гурвн танкин экипажд түрүн нүүрт дävрдж орх даалгьвр командовань өгсиг, берк гидг сәәнәр күцävвдн.

Мана гурвн танкин экипаж Зееловск уулин ораг дәәлдж эздж авсна тускар маньгьдуртнь армейск газетд барлгддж гарла...

Дарунь, удл уга, мана Советск аярм диилврин улан туган Берлинд, Рейхстаг деер делсгв.

БЕЛГИН САНЬГЬДЖ,

офицер, танкин командир, орден зуугьач, Төрскән харслгьна дәәнә инзалид.